

## Lozärn

Om dini Schöheit z gseh muess mer weder dech schmenke, no öppis trenke.  
Zahlriich send dini Verehrer, Polizeschte, Aawält ond au Lehrer.  
Dini Aaziehigschraft esch gigantisch ond met der esches emmer romantisch,  
din Charme verzaubere mech magisch gäbs dis Lüchte ned wär das tragisch.

Lozärn mer hend dech gärn,  
schöni Wohnquartier ond Eichhofbier.  
Lozärn es bruucht ned meh  
als Alpenquai, Bärge ond See.

S Löwedänkmol zieht Toureste ah, us Asie ond Amerika.  
Sie probiered mol en Rolex ah ond wennd es Schwiizer Mässer ha.  
Sie schiessed tuusig Fötteli ond ässed feini Schöggeli,  
zom Schloss no öber d Chappelbrogg im Inseli in Car ond zrogg.

Lozärn mer hend dech gärn,  
trotz Touresteschwärm ond Autolärm.  
Lozärn es bruucht ned meh  
als Gletschergarte ond Stadtrondfahrte.

Wott ech vom KKL zom Gütschhotel, denn gohn ech met de VBL.  
Ech warte a de Bushaltstell, doch generell gods ned so schnell.  
Ech löse mis Abonnemänt ond froge mech öb s'Gäld no längt,  
doch de Tüechlimaa hed för d Notschlofstell us mim Portemonnaie es 20i zvell.

Lozärn mer hend dech gärn,  
du besch die schönsti Stadt ohni ÖV-Rabatt.  
Lozärn oje oje,  
dini Sparmassnahme spränged jede Rahme.

Lozärn mer hend dech gärn,  
vo KKL bes Gütschhotel.  
Lozärn es tuet so weh,  
de FCL a letschter Stell.

Lozärn mer hend dech gärn.